



*Rabu, 31 Agustus 2022*  
**Ogen: Perb. Rasul 16:13-15,40**



**Kesilang ku rumahku**



**S**ekalak ndehara gelarna Lidia. Pendahinna eme erbinaga Suis si meherga. Aminna pe sibuk bas pendahinna, tapi tetap mereken waktu reh ku Rumah Pertoton. Tutus atena ersembah man Dibata. Italangi Tuhan pusuhna, tutus kal atena megiken Kata Dibata. Alu megermet ibegikenna tep-tep Kata Dibata sinibelasken. Kinitutusen atena e mpelimbarui kegeluhenna; iendeskenna dirina ras seisi jabuna guna iperidiken. Iberekenna ka pe kai si lit bas ia guna kiniulin pelayanen alu ngundang serayan Tuhan e reh kesilang ku rumahna. Menarik akap kami bas penuriken teks enda ikataken "ipindokenna kal maka kami kesilang ku rumahna (Bahasa Indobesia: *Ia mendesak sampai kami menerimanya*)". Ersuruh ukurna dingen meriah kal niakap jadikan kai si lit bas ia guna Dibata ernanam man kalak si enteren. Meriah kal ukur Lidia adi kalak sideban kesilang ku rumahna, emaka ipindo kenna kal segelah kalak enda reh.

Kata mpelimbarui cara rukur, lagu langkah bagepe perayaken geluh. Adi siukuri, situhuna enggo rusur kal kita megiken Kata Dibata, la terjeng bas PJJ, Kebaktin perminggun, PA Kategorial, paksa teneng ras sidebanna. Nulih kita natap kempak dirinta sekalak-sekalak terjeng ja enggo kegeluhenta ipelimbarui terkusus jadikan kiniliten guna si enterem. Semalna bas budaya kita kalak Karo si enda pe rusur si belasken kune jumpa ras kalak sideban ninta "reh kam ku rumah ya". Ranan enda labo segelah enggo ibelasken saja (basa-basi) tapi min rehna bas pusuh si meriah nari. Adi si oge bas ayat 40, rumah Lidia la terjeng ingan kesilang tapi pe ingan petetap ukur kalak si reh ku je. Tentuna kalak si reh pe ku je malem atena, tetap ukurna ernalem man Dibata. Bagekalah kita, jadikan rumahta jadi ingan petetap ukur enterem jelma segelah rumahta jadi rumah perpulungen nambahi kiniteken ras semangat geluh.